

Liloba na Nzambe eyei epai na mosakoli William Marrion Branham

“Milimo na kozimbisa kotelemela Liloba na Nzambe”

Kokweyisa mosumuki te. Yokela ye mawa. Tika ye akoba komela pipe na ye, tika ye amela masanga na ye, tika ye abeta kalati na ye. Yango nde esengo na ye. Kopamela ye te. Ntango azongaka na ndako pe soko nini lisusu, alembi pe abukanibukani, alingaka kosepela. Oyo osengeli kosala ezali ete obika bomoi oyo ebulisami mpenza na lolenge ete okoka kotalisa ye ete oyo ezali kati na Nsango Malamumu mpo na ye, eleki oyo wana mbala koto zomi. Pe soki akufi na motindo wana, akokende na lifelo, na masanga na ye. Oyo wana ezali nde ngenge ya zabololo. Soki akufi, wana ezali ye kokoba komela pipe yango ya kala, Nzambe azali Mosambisi na ye. Soki akufi, wana ezali ye kokoba kobima, kobina, pe kowayawaya na bilamba ya nsoni, Nzambe azali Mosambisi na ye.

Kasi likambo moko ezali solo, soki okufi na nse ya epakweli ya Nguya ya Molimo Mosantu, lokola Etieni ntango atombolaki miso na likolo pe amonaki elongi na Nzambe, alobaki: “Namoni Lola efungwami, pe Yesu ateleme na loboko ya mobali”, ozali na nzela ya Lola, lokola ndeke na mbangu kokende na ndako na ye. Amen.

Milimo ya kozimbisa kotelemela Liloba na Nzambe! Tika, mitika. “Basalaka yango ndenge nini, Ndeko Branham?” Mitika kaka. Nyonso osengeli kosala yango wana. Kamata Liloba na Nzambe. Koluka kosala soko nini te. Kokende kofukama na etumbelo te pe kobeta likolo na yango, na kogangaka makasi: “E Nzambe, pesa ngai Molimo Mosantu! Nkolo, pesa ngai Molimo Mosantu!” Akoya te, ntango ozali kobeta likolo na etumbelo yango. Yango ezali na ntina te. Te. Ye ayaka na motindo oyo wana te. Ezali, kozua Ye na Maloba na Ye!

Tala Petelo. Petelo azalaki na mitungisi, emonanaki lokola alingaki kokufa. Bongo amonaki Nkolo azali koya, kotambolaka likolo na mai. Alobaki: "Nkolo, soki ezali Yo, loba ete naya".

Nkolo alobaki: "Yaka".

Na bongo, Petelo alobaki: "Boye zela moke, Nkolo, tika nakila mikolo ntuku minei, mpo namona soki nakoki kotambola likolo na mai, to te. E Nkolo, sala ete napakolama na Molimo na ndenge ekoki, mpo nabina na Molimo pe naloba na minoko mosusu, na kati na buato oyo, bongo nakoka koya"? Te, mesie! Azuaki Nzambe na maloba na Ye, atikaki pe amitikaki. Nzambe akomisaki ye malamumu.

Bongo soki Nzambe akutanaka na Mose, pe Alobaka na ye: "Mose, kende kuna na Ezipito, pe yebisa Falo: 'Tika bato na Ngai bakende'"? Bongo soki Mose alobaka: "Tika ngai naino nakila mikolo ntuku minei, mpo namona soki nazali na kondima oyo ekoki mpo na kotosa Yo, e Nzambe. Pesa ngai eloko moko, ata eloko nini, Nkolo. Tika nayebisa Yo likambo moko, tika naino namona soki nakoki kokota na Molimo"? Mose atunaka mituna soko moke te, azuaki Nzambe bobele na maloba na Ye, pe akendeki. Osengeli kosala nde bongo, zua Nzambe na maloba na Ye. Na bongo okoyeba ete okoki kosala likambo yango. Azilaki te ete eloko mosusu esalema, akendeki bobele liboso pe asalaki yango.

Toloba nini mpo na Eliya, ntango akitaki uta na ngomba na Karmel, nsima na ye kouwela kuna na likolo? Akutanaki na mwasi mobola akufela mobali. Azalaki... azalaki mopaya, mwasi ya mabota. Bongo ntango akutanaki na ye kuna, azalaki kolokota nkoni, na libanda. Pe Nzambe alobaki na ye: "Kende na ndako ya mwasi wana akufela mobali". Ezalaki mpenza esika malamumu te mpo na moteyi!

Bongo akei na ndako ya mwasi yango akufela mobali. Pe, na ntango wana, mwasi yango azalaki na nkoni mibale. Alobaki: "Ozali kosala nini?"

Alobaki: “Nazali kolokota nkoni. Nazali bobele na mwa fufu mpo nalamba mikate mibale to misato ya masangu. Nde nyonso oyo natikali na yango. Eleki mibu misato mbula enoki te”. Alobaki: “Nsima nakolamba mikate oyo ya masangu. Tokolia yango ngai na mwana na ngai, nsima na yango tokokufa”.

Alobaki: “Lambela ngai naino moko!” Aleluya! Oo, nayebi ete nazali na mwa ligboma, kasi, ata boni, nazali na ngambo na Nkolo. Alobaki: “Lambela ngai naino moko! Mpo YANGO ELOBI NKOLO!” Yango wana.

Ezali nini? “Boluka liboso Bokonzi na Nzambe, pe boyengebeni na Ye!” Ezali te Bokonzi na Nzambe na “mwa makelele”, ezali te Bokonzi na Nzambe na “mwa koningana”, ezali te Bokonzi na Nzambe na “mwa *boye* na *boye*”. Kasi “Nzambe, pe boyengebeni na Ye, pe biloko nyonso oyo mosusu bikobakisamela bino!” Pesa yango esika ya liboso!

Na bongo, mokufeli mobali oyo ayokaki yango. Kondima euti na koyoka, koyoka euti na Liloba. Alobaki: “Oyo ezali Liloba na Nkolo, mpamba te oyo azali mosantu na Nzambe. Azali mosakoli na Nzambe, pe nayebi ete ezali solo. Pe ezali Liloba na Nzambe”.

Na bongo, akimaki mbangu te mpo na kotuna bazalani ndenge nini asala. Alingaki te kokende kokabola...koyebisa bazalani, koloba: “Boye, bokanisi boni? Moteyi azali na ndako na ngai, azali koloba *boye*. Susie, okanisi nini na likambo yango?”

Akotaki, pe abandaki kosopa nyonso. Amitikaki. Atikaki oyo azalaki na yango, mpo akoka kozua koleka. Tala oyo mokili esengeli na yango lelo, ezali nde kotika nyonso oyo ozali na yango na lolenge ya kala. Aleluya! Asopaki nyonso, mpo akoka kotondisama. Asopaki mafuta nyonso oyo azalaki na yango, pe mafuta nyonso oyo azalaki na yango na fufu nyonso oyo azalaki na yango, mpo na moteyi, mpo na Bokonzi na Nzambe. Pe ntango asilisaki nyonso oyo ezalaki na kati, Nzambe akitaki, Atondisaki mbeki ya fufu, Atondisaki molangi ya mafuta. Asopaki lisusu

nyonso, na sani ya moteyi, Akitaki, pe Atondisaki yango lisusu. Azalaki kotondisa. Mbala nyonso azalaki kosilisa, Ye azalaki kotondisa.

Nakoloba boye, lelo, soko bato balingi kobimisa bizaleli mabe nyonso ya bozoba, pe boklisto ya komekola, pe kotika Molimo Mosantu azua esika na Ye, kolamuka moko ekobanda na matakanelo ya Balabala ya Mwambe pe balabala Penn, oyo ekopalangana na mboka mobimba. Botika bozoba wana, bozonga na Liloba na Nzambe. Sopa nyonso, mpo okoka kotondisama. Tika ekende, bongo Nzambe akotika ete eya. Yo sopa nyonso, Nzambe akotondisa yo. Makambo nyonso oyo ezanga ntina: “Osengeli kosala *oyo*, pe osengeli kosala *oyo kuna*, esengelaki ete osala *oyo*, esengelaki ete osala *oyo kuna*”. Bosana yango! Bimisa yango na bomoi na yo!

Loba: “E Nzambe, tika ete nazala banda nyonso oyo...lelo, nazala mobimba wa Yo. Nkolo, naye na motema oyo ebukani. Naye na molimo oyo etutani. Nalingi Yo. Oyebi ete nalingi Yo. Pe nalingi kobosana bolema nyonso oyo ya kokila nyonso oyo ya mikolo ntuku minei mpo namona soko nakoki kobeleva na Nzambe koleka, pe nyonso *oyo, oyo kuna, pe oyo mosusu*, bozoba nyonso oyo”.

Sukisa yango! Ezali na eloko moko te kati na Liloba oyo eyebisi yo ete okila mikolo ntuku minei. Eloko ata moko te. Eloko ata moko te na mokili eyebisi yo okila, soki Nzambe ayebisi yo yango te. Soki ozali kokila okoyoka nzala te, na nyonso oyo mosusu. Ntango ozali kokila, ndeko, okozala na nsai pe esengo ntango nyonso. Alobaki: “Bomitalisa na bato te lokola bakosi, oyo bazuaka lolenge ya bolembu pe ya mawa. ‘Nazali kokila bilei mikolo ntuku minei, mino oyo nalataka ekokoka na ngai lisusu te. Nabungisi livre ntuku misato [kilo 13—N.D.T.], pe bayebisi ngai ete nakomi na kitoko nsima na yango.” Oo, bozoba! Ezali milimo ya kozimbisa oyo euti na zabolo.

Kopusana na etumbelo, pe koloba “nkembo, nkembo, nkembo” kino ete okoka koloba ata eloko mosusu te, pe koloba ete “esengeli ete oloba minoko mosusu yambo ya kozua Molimo Mosantu”. Bozoba! Bimisa yango nyonso!

Bimisa yango na makanisi na yo, pe yaka kotelema likolo na Liloba na Nzambe! Alobaki: “Bobongola mitema moko moko na bino, pe bobatisama na Nkombo na Nkolo Yesu Klisto mpo na kolimbisama na masumu na bino, pe bokozua likabo ya Molimo Mosantu”. Soki Nzambe akokisi Liloba na Ye te, Azali Nzambe te. Amen. Sopa nyonso! Tondisama! Amen. Uu! Nalingi yango, ezali Liloba na Ye. Nzambe alobaki yango. Ezali solo. Pe ntango Nzambe alobi likambo, Nzambe akotala yango. Malamu. Kolengele nyonso ozali kosala, kokende nyonso oyo okendeke na ndakonzambe ndenge...

Ezali lokola awa na izini ya kosala wago epai wapi basalaka wago ebele ya komema biloko, to wago ebele ya komema bato. Nazalaka kosala kuna. Bongo bakamataka pe basali wago oyo ya minene pe nyonso wana, batiaka mabaya ya makasi, ya acajou, na ngambo nyonso, pe nyonso ekomaka kitoko mpenza, na nsima bakotia yango na nzela ya engbunduka, kasi ezalaka mpenza lokola ebembe. Moto ya engbunduka ezalaki wana, kasi ata molinga te, etelemaki se wana.

Oyo esengeli na yango lelo ezali nde mwa moto na nse ya mombonda. Oyo esengeli na yango lelo ezali mwa molinga. Oyo lingomba esengeli na yango lelo, mpo na kotoka... Eloko ya moto koleka oyo ezali kotoka mpo na kotokisa lisumu pe kobimisa yango na bomoi na yo, ezali nde bolingo. Pe soki bokoki kolingana te bino na bino, ndenge nini bokolinga Nzambe oyo bomona te? Bolingo ezipaka ebele na masumu. Bobanda kolingia Nzambe, na bongo bokolingana bino na bino, na bongo bokolinga lingomba, bokolinga Likambo, bokolinga nyonso oyo ezali mosantu, pe bokomipekisa na makambo ya mokili.

Milimo ya kozimbisa ezali koyengayenga pe koloba na bato *boye na boye* to *likambo mosusu*, ete “basengeli kosala *boye*, basengeli kosala *bongo*”. Ezali mpo ete bibongiseli bibimi, bazali na mwa emoniseli moke, na lolenge ete bazali koloba: “Ee, sikawa, nandimi ete moto... Nandimi ete eloko lokola koganga ezali kati na Biblia”. Ezali solo, ezali bosolo. Basali ebongiseli uta na yango: “Ntango ogangi, ozui Ye”. Kasi ozui Ye te.

Mosusu ebimi, elobi : “Koloba minoko mosusu”. Ezali ya solo, ezali kati na Biblia. “Kasi, ntango olobi minoko mosusu, ozui Ye”. Kasi mingi kati na bango balobaki minoko mosusu pe bazuaki Ye te. Bomoni? Ezali yango te. Te mesie.

Mingi kati na bango balobaki : “Ee, tosengeli kosakola”.

Tala basakoli oyo balati maseke na moto na bango, bazali kopimbwapimbwa pe kosakola. Mika alobaki : “Bino banso bozali kokosa”. Amen. Solo. Nzambe ayaka bongo te. Nzambe ayaka na motema ya sembo oyo ezali kobeleva na molimo oyo ebukani, oyo etutani. “Ye oyo akei kolona na kolela, akozonga solo mpenza na kosepela, ntango akomema mabokeye na ye ya mbuma na motuya”. Amen. Sosola yango malamumu, moninga.

(Ekamatami kati na *Milimo na kozimbisa*, eteyamaki mokolo mwa 24 sanza ya nsambo mobu 1955)

Esalemi na lingala na mobu 2004.

LINGALA

©2004 VGR, ALL RIGHTS RESERVED

VOICE OF GOD RECORDINGS
P.O. BOX 950, Jeffersonville, Indiana 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org